

四庫全書

史部

欽定四庫全書

史部

江南通志卷三十三

詳校官給事中臣丁雲錦

檢討臣德生覆勘

總校官編修臣王燕緒

校對官編修臣勵守謙

謄錄監生臣蔣繼勳

欽定四庫全書

江南通志卷三十三

輿地志

古蹟

四揚徐二府太南通三州

揚州府

廣陵城在府東北去江四十里戰國楚邑史記云
楚懷王十年城廣陵秦置廣陵縣漢吳王濞都此
為江都國後漢為廣陵郡隋曰揚州故城西據蜀

岡北包雷陂外有大城中為子城亦曰牙城周顯德四年韓令坤以城大難守築故城東南隅為小城以治之既而李重進始改築於故城南二十里宋建炎三年郭棣知揚州以故城憑高臨下四面險固即遺址建築謂之大城明初於大城西南隅改築而故城廢府志云北濠即今柴河其上城基培塿可尋南濠即運河今云蔡家山者即其南角樓也東門在東水關內

江都故城在江都縣西南四十六里漢置寰宇記
云城臨江水為水所侵齧無復餘址

邗溝城在甘泉縣蜀岡上左傳杜預注云吳將伐
齊自廣陵城東築邗城城下掘深溝謂之邗溝城
與縣城在甘泉縣漢置屬臨淮郡

張公城在甘泉縣漢桓帝時廣陵張嬰所築張綱
為郡守單騎造其壘示以恩信嬰悅服歸降因號
張公城

新城在甘泉縣非今之新城也晉寧康十年謝安
出鎮廣陵之步邱築城邵伯埭明歐大任詩云謝
公鎮廣陵甘棠人勿剪君見東山雲何似邵伯堰
今堰存城廢

蕪城在甘泉縣宋寶祐志云即邗溝城歲久荒蕪
宋鮑照作蕪城賦遂稱蕪城趙鶴郡乘又謂蕪城

為劉宋時城

附

南北朝宋鮑照蕪城賦

灞池平原南馳蒼梧

漲海北走紫塞鴈門抱以漕渠軸以崑岡重江複
關之隩四會五達之莊當昔全盛之時車挂鞞人

駕肩屨閑撲地歌吹沸天孽貨鹽田鏹利銅山才
力雄富士馬精研故能侈秦法佚周令劉崇墉剗
濬洫圖修世以休命是以板築雄堞之殷并幹烽
魯之勤格高五嶽表廣三墳岬若斷岸矗似長雲
製磁石以禦衝糊楨壞以飛文觀基扁之固護將
萬祀而一君出入三代五百餘載竟瓜剖而豆分
澤葵依井荒葛冒途壇羅虺域階鬪齧廳木魅山
鬼野鼠城狐風啤雨嘯昏見晨趨饑鷹厲叨寒鷗
嚇雛伏虺藏虎乳血餐膚崩榛塞路呼嶸古虺白
楊早落塞草前衰稜稜霜氣荻荻風威孤蓬自振
鷲沙坐飛灌莽香而無際叢薄紛其相依通池既
已夷峻隅又以頽直視千里外惟見起黃埃凝思
寂聽心傷已摧若夫藻扃黼帳歌堂舞閣之基璇
淵碧樹戈林釣渚之館吳棊齊秦之聲魚龍爵馬
之玩皆薰歇燼滅光沉響絕東都妙姬南國麗人
蕙心紈質玉貌絳脣莫不埋魂幽石委骨窮塵豈

憶同輦之愉樂離宮之苦辛哉天道如何吞恨者
多抽琴命操為蕪城之歌歌曰邊風起兮城上寒
井徑滅兮丘隴殘千齡
兮萬代共盡兮何言

寶祐城在甘泉縣舊名堡城即隋迷樓故址宋寶
祐四年勅大使賈似道築詔謂包平山而瞰雷塘
者此也又有夾城在西北四里亦是時築

左安城在儀徵縣西二十里宋治平中建地多山
谿旁有崇邱道出六合蓋舊時戍守處也

新城在高郵州東北宋咸淳初揚州制置使畢再

遇築土城於東北二門外與舊城相埒今僅存遺址
子城在泰州城內東北隅周二里有竒表裏皆甃
周刺史荆罕儒築今圯

新城在泰州北宋端平中州守許堪修州城別築
堡城於湖蕩中去城五里謂之新城

海安故城在泰州東一百二十里劉宋置明初常
遇春至泰州舊城遂東築海安城屯兵絕張士誠
通州餉道

安宜城在寶應縣西南本漢平安縣治蕭齊改置
安宜縣

石鼈城在寶應縣西八十里魏鄧艾築此以營田
晉永和中荀羨鎮淮陰屯田於東陽之石鼈即此
通典云山陽重鎮守險有平陽石鼈

金牛城在寶應縣東南十五里孝義鄉宋熙寧間
築土色皆黃形狀如牛

韓王城在寶應縣東南四十里宋紹興間韓世忠

鎮淮陰時築又高黎王城在縣西南八十里侯村
鄉宋治平中高黎王築

廣業廢郡在高郵州梁析竹塘三歸二縣置

齊陵廢縣在江都縣東南六十里齊永平初置建
武五年過艾陵湖水立裘塘屯移縣於萬歲村

江陽廢縣在江都縣隋志云舊曰廣陵開皇十八
年置縣曰邗江大業初更名江陽

揚子廢縣在儀徵縣東南十五里漢江都縣地隋

末杜伏威置戍守於此名揚子鎮唐永淳初置揚子縣

高郵廢縣即今高郵州治秦高郵亭也漢置縣屬廣陵國宋秦觀詩云吾鄉如履孟高據揚楚眷環以萬頃湖粘天如四壁故亦名孟城

臨澤廢縣在高郵州東北九十里劉宋置今臨澤鎮即故縣也

海陵廢縣即今泰州治漢置九域志云東至海一

百七里

建陵廢縣在泰州東北七十里晉義熙中置

寧海廢縣在泰州東南一百里晉義熙中置今為
寧海鄉又有蒲濤廢縣在州東南今蒲津鄉疑即
其地

宋郊壇在江都縣南門外法雲寺建炎二年高宗
祀天南郊築壇在此

柴墟在泰州南七里宋岳飛以泰州無險可恃退

保柴墟即此

隋臨江宮在江都縣南二十里大業七年帝升釣
臺臨揚子津大宴百僚遂建此亦曰揚子宮宮內
有凝輝殿宮西有懸鏡亭澄月亭春江亭又有顯
福宮在城外東北詳見宋寶祐志趙鶴郡乘

宋行宮在江都縣治宋建炎元年高宗奉太后至
揚州駐此

楊吳故宮在江都縣舊子城內久廢

隋江都宮在甘泉縣大儀鄉大業元年敕王弘大修江都宮中有成象殿流珠堂水精殿諸處令宮人盛飾謂之飛仙今為上方禪智寺又有十宮在城北五里長阜苑內曰歸鴈曰回流曰松林曰楓林曰大雷曰小雷曰春草曰九華曰光汾曰九里南唐永寧宮在秦州城內李昇遷楊行密子孫於海陵號其居曰永寧宮相傳州治譙樓即其宮闕故址

太子院在儀徵縣橫山西即禪證寺梁昭明太子讀書建堂於此後僧神堅改為太子院

淮東道院在泰州舊治內大廳之東宋左丞陸佃為守時以海陵地僻事簡謂之道院後嘉定間郡守李珙始加淮東二字

宋章武殿在江都縣建隆寺宋祀太祖御容於此
崇政殿在江都縣宋建炎二年高宗策諸郡奏名進士於崇政殿

海陵監在泰州東北百二十里五代煮鹽之務也
南唐昇元初於海陵置州以轄其監管鹽場八南
四北四開寶七年置監於如臯縣

海陵倉在泰州東漢吳王濞所置太倉也枚乘傳
所謂海陵之倉即此

甲仗樓在江都縣新城晉謝安建

文選樓在江都縣太平橋北旌忠寺大業拾遺記
云有梁昭明太子文選樓王觀揚州賦云帝子久

去今空文選之樓

鳳凰樓在江都縣廣北鄉鳳凰池側十道志云隋
煬帝建

迎仙樓在江都縣唐淮南節度使高駢建於解邸
羅隱詩云仙境是誰知處所人間空自造樓臺

籌邊樓在江都縣宋郭棣知揚州建曰籌邊又即
府南門城建樓曰鎮淮

明月樓在江都縣大街東元富民趙氏嘗宴客樓

上趙孟頫過之乞作楮帖題云春風閣苑三千客
明月揚州第一樓主人大悅徹酒器為壽

江淮勝槩樓在江都縣瓜洲鎮明正統十三年周
忱建王英記

騎鶴樓在江都縣大街內以太平廣記騎鶴上揚
州句名

摘星樓在甘泉縣西北城角即迷樓故址宋紹聖
三年晁補之修後為寶祐城樓府志云後有摘星

亭摘星臺皆其地

卷書樓在甘泉縣西北隅宋高宗駐蹕揚州以提
點解為尚書省禮部程俱寓直詩有夜寒持被卷
書樓之句

揚子江樓在儀徵縣南唐時建府志云宋慶元中
郡守吳洪再建於鑑遠亭北更名頰江樓

烟雨奇觀樓在儀徵縣西南大江濱宋吳機詩序
謂江山一景實儀徵勝槩因建此樓蓋取葉石林

半空烟雨之句又建中和樓在朝宗門上

淮春樓在高郵州西北宋郡守趙不慙建

多寶樓在高郵州北門外太平街西賈商雲集競
售珍奇今僅存橋名寶樓橋

望京樓在泰州宋咸平中曾致堯建

景范樓在泰州迎恩門內宋范仲淹舊行衙也

清風樓在泰州舊治內又名清風閣

彭城閣在江都縣大業雜記注云舊為彭城村隋

煬帝因地名閣

延和閣在江都縣治內唐高駢建高八丈飾以珠玉綺窓繡戶每旦焚名香列異寶以祈王母之降羅隱詩云延和高閣上干雲小語猶疑天上聞燒盡降真無一事閉門迎得畢將軍

觀音閣在甘泉縣即迷樓故址舊傳為吳絳仙梳粧臺

雲山閣在甘泉縣西北隅即環碧亭舊址寶祐志

云陳升之建名勝志云呂公著守揚時建落成值
中秋燕客其上秦觀即席賦詩一坐歡服

玉鈎亭在江都縣唐李夷簡鎮淮南於城西南見
新月如鈎遂建此亭

賞心亭在江都縣唐李蔚鎮淮海於戲馬臺西建
此亭適薛陽陶至秦蘆管一曲其聲自然如來天
上蔚大佳賞贈以詩云虛心織質鴈銜餘鳳吹龍
吟定不如亭未有名因名賞心春明退朝錄云唐

成都有散花樓河中有薰風樓綠莎廳揚州有賞
心亭潤州有千嵒亭皆勝蹟

竹西亭在江都縣大儀鄉寶祐志云官河北岸禪
智寺前唐杜牧詩誰知竹西路歌吹古揚州因名
風亭在江都縣治內宋徐湛之為南充州刺史以
廣陵城北多陂澤水物豐盛乃建風亭月觀吹臺
琴室並在宮城東北角池側招集文士極一時遊
玩之盛

無雙亭在江都縣后土殿西宋王禹偁移瓊花詩
序云后土殿瓊花天下獨一株耳永叔為揚州作
無雙亭以賞之彼土人別號八仙花或曰李衛公
所賦玉蕊即此非也詳見辯訛又有瓊花臺則元
人以八仙花補植者

美泉亭在江都縣治內宋歐陽修建鄭興裔重修
斗野亭在江都縣邵伯埭宋熙寧二年建輿地志
云揚州於天文屬斗野故名紹興元年鄭興裔更

造於州城迎恩橋南嘉定間崔與之改題曰江淮
要津

四柏亭在江都縣宋元豐中教授崔浩著四柏賦
以見志淳熙中重建學宮教授彭方復植四柏於
廳事之南因以名亭

借山亭在江都縣九曲池北宋馬仲甫買池築亭
名曰借山

勸耕亭舊在江都縣淮海堂後每歲仲春郡守出

郊勸農寓於上方寺宋慶元五年郭杲改建亭於
寺前遂移舊亭題額於此

江山風月亭在江都縣瓜洲鎮東南元熊漢卿別
墅鎮南王嘗避暑於此

春貢亭在甘泉縣蜀岡宋時揚州貢茶皆出蜀岡
因名

水亭在甘泉縣北隅唐獨孤及建南唐徐知誥引
宋齊邱畫灰秘謀於此

延賓亭在甘泉縣南唐李昇建

白沙亭舊在儀徵縣白沙洲唐韋應物有白沙亭
逢吳叟歌宋嘉定間方信儒移於注目亭故址

青鸞亭白鶴亭在儀徵縣西小山宋祥符間詔即
其地鑄聖像有青鸞白鶴飛繞爐冶之上因立二
亭

谿陰亭在儀徵縣東范氏園宋蘇軾詩云白水滿
時雙鷺下綠槐高處一蟬吟酒醒門外三竿日臥

看谿南十畝陰

壯觀亭在儀徵縣北三里北山之巔宋政和中郡
守詹度建米芾題額芾詩邀賓壯觀不辭寒玉立
風神氣上干又東有扁岫亭宋發運便張嗣昌創

附 宋楊萬里重建壯觀亭記

儀徵遊觀登臨之勝處有二發運司之東

園北山之壯觀亭是也亭立北山之椒居高俯下
江淮表裏皆在目中自城中以望亭中如高人勝
士登山臨水而送歸人也如仰中天之臺縹緲於
烟雲之外也自亭中以望江南之羣山如驪黃駮
耳競奔爭馳而不可繫也如安期美門御風騎氣
隔水相招而不得親也米元章嘗官發運司暇則

徘徊其上為之城且大書其扁至建炎庚戌火於
兵再至紹興辛巳又火於兵淮人過者固不慨歎
今太守左昌時屬工徒為屋三楹為墻百堵前敞
以軒後邃以檻植萬松以綠其西北又藝桃李梅
杏楊柳千本以物其南谷儀徵之士民登而樂之
相與謁予記且曰吾侯秩滿將歸於朝留之不可
惟侯奉法循理節用愛人至於葺府庾繕溝壘訓
兵戎虞疆塲夙夜殫力以整以備江海盜寇悉縛
至麾下姦惡跡熄不敢竊發年歲海登倍獲他境
因治之餘復此壯觀州人老倪再見承平氣象俾
過之者得以挹江南之形勝而起騷人之思北望
神州而動擊楫枕戈之想則斯亭豈特遊觀登臨
之勝而已哉願為特書惠爾淮士以詔
於無止余曰諾哉紹熙二年四月記

鑑遠亭舊在儀徵縣潮隄西宋米芾書額後建於

城西南曰注日亭慶元中又建於潁江樓前仍名
鑑遠

天開圖畫亭舊在儀徵縣西城上取山谷天開圖
畫卽江山之句以名宋淳熙中郡守姚恪建後因
甃城而廢以其名揭於潁江樓嘉定間吳機別建
於朝宗門外江濱又於其後創水竹喜涼漣漪聞
凱傳幽五亭

翫珠亭在高郵州北一十里樊良鎮宋嘉祐間天

長澤陂有一大珠天晦多見後轉入甌社湖或在
新開湖鎮當珠往還之處因建此亭

濯纓亭滄浪亭在興化縣舊稅務前宋天聖間范
仲淹建范詩笑解塵纓處滄浪無限情

浮香亭在秦州舊治藕花洲之後有古梅秦太虛
諸人唱和黃法曹梅花是也宋紹興初陳垓守秦
州鐫茂陵御書額及秦觀蘇軾蘇轍詩於上垓又
建須友亭與浮香亭對種竹為屋曰須友以竹必

友梅也又建歸鶴亭在州東七里響林昇真觀內
每歲二月勸耕坐亭中勞父老以酒果或與客觴
詠竟日

海嶼亭在秦州西南宋建炎前將迎所也米芾書
額

溪光亭在秦州西溪鎮迎賓亭避湖亭奉先亭距
此不遠俱宋范仲淹建

迎止亭在秦州西溪鎮北中洲山有宋范仲淹遺

跡

南風亭在泰州西溪鎮西南宋晏殊建

思賢亭在泰州西溪鎮東寺塔院宋呂夷簡手植牡丹於此後人思之因建亭曰思賢

孔融臺在江都縣寶鏡巷內李文饒賦云廣陵東南有顏太師猶子宅即孔北海故臺

鬪雞臺今失所在按拾遺記煬帝於吳公宅鬪雞臺下恍惚與陳後主相遇杜牧揚州詩云秋風放

螢苑春草關雞臺

崑邱臺在江都縣禪智寺側宋歐陽修築府志云
臺名取鮑照軸以崑岡之句明歐大任詩云地軸
橫崑岡上有百尺臺

戲馬臺在江都縣桂苑叢談作戲馬亭後山詩話
云其下路即玉鈎斜

吳王濞釣臺大觀圖經云在揚州城北十二里高
二丈

吳公臺在甘泉縣劉宋大明三年沈慶之攻竟陵
王誕時所築

弩臺高十丈周二百步陳大建中吳明徹圍東廣
州增築之以射城內故名府志云一名雞臺唐武
德中葬煬帝於吳公臺下即此其下有路號玉鈎
斜為隋宮女葬處

樂遊臺在儀徵縣北六里城子山一名東巡臺
文游臺在高郵州東宋蘇軾孫覺秦觀王鞏同游

載酒論文於此因名李公麟為圖刻於石

國朝王士禎重修文游臺記

古來風流文采魁梧奇傑之士其在當時或不遇或

過矣而以名高而取忌守道而叢謗至不得一日安其身於廟堂之上甚者播遷江湖嶺嶠之間而坎壈以老死然數千百年後學士大夫讀其書思慕其為人至於其所嘗游眺憇息之地必且披榛棘訪碑誌往往為之流連感激太息憑吊於荒烟斷霜之中豈其遇有幸不幸歟抑豐於此則歉於彼天道之乘除同然歟昔蘇長公生宋盛時以文章名動天下試館閣為侍從之臣存歷大藩天子至以宰相器之不可謂不遇矣然終以直道見尤謝景溫李定舒亶之屬繼肆其彈射卒至流離惠州僂耳窮海絕嶠之濱不完其用為天下惜至并所為文章亦禁錮之何其不幸也考公平生踪跡

多在江淮又嘗與孫羊老秦少游王定國輩游處
最善而孫秦二君子者皆高郵人故郵樂得公而
顯而文游臺在城東北里許即公與三君子所嘗游
眺者也宋淳熙中王詡葺之嘉泰中吳鑄重新之其
興廢之蹟大畧見於應公武王元凱二記自明正
德迄今康熙又二百餘年矣余以順治十七年四
月來李廣陵文書之暇多泛小舟往來三十六湖
之上因登足臺而弔之嗟其頽廢荒落謀諸州守
吳君及州之士大夫思所以修葺而振起之者會
吳君秩滿推蜀之龍安守以去繼之者閩海曾君
余復告之而曾君又以憂歸繼之者鐵嶺李君余
告之如初蓋始辛丑迄甲辰閱四歲三守而臺之
工以成余因是慨然有感也方公洎三君子以直
道不見容於世故跡湖海登是臺以嘯詠發舒其
無聊不平之氣亦偶然耳豈當計及數百年之後
斯臺存歿與後之人為之太息憑弔感激而流連

者耶余生後公且五六百載猶得登斯臺拜公祠
宇恨不及四公當日同其游眺登臨之樂而親聆
其音旨詩曰高山仰止景行行止斯臺也亦後之
高山景行也自宋迄今閱五六百載所謂僉壬者
其人與骨皆已朽而斯臺歸然公之風流照映於
無窮然則公不可謂不幸也公嘗作太息一篇送
少游之弟少章有感於孔北海之論威孝章也其
言曰英偉竒逸之士不容於世俗久矣雖然自今
觀之孔北海威孝章猶在世而向之譏評者與草
木同腐嗟乎昔之視古不猶今之視昔乎臺在秦
山廟後有樓有亭皆可以望遠登其上則長湖森
漫風帆杳靄稻塍柳陌繡錯而碁布於秋高密雪
之時尤宜樓與亭皆不
自名而從臺者存占也

拱極臺在興化縣北城即元武臺故址元縣令詹

士龍讀書處府志云昭陽十二景之一

讀書臺在寶應縣西八十里齊興寺內舊傳梁武

帝讀書處

四并堂宋韓琦於郡圃建堂取四難并之義府志
云後慶元中趙鞏復建於杏花村

康山草堂在江都縣新城東南隅築土為山構堂
其上明正德中康海去官客揚州與名流常讌此
董其昌題額曰康山草堂

時會堂在甘泉縣蜀岡宋造貢茶之所梅堯臣詩
云雨發雷塘不起塵蜀崑岡上暖先春烟牙才吐
朱輪出向此親封御餅新

平山堂在甘泉縣蜀岡上宋郡守歐陽修建江南
諸山拱列簷下因名咸淳五年李庭芝鎮揚州築
城包之城廢堂亦為栖靈寺僧所據康熙二十年
郡守金鎮建堂寺右堂後增樓五楹額曰真賞祀
歷代賢郡守於其上二十三年

聖祖南巡臨幸

御書怡情二字四十四年又

御書平山堂及賢守清風四字懸額堂內

聖祖御製平山堂詩

恭紀首卷附

宋沈括平山堂記

揚州

制淮南十一郡之地自淮南之西大江之東南至五嶺蜀漢十一路百州之遠僦貿易之人往還皆出其下舟車南北日夜灌輸京師者居天下之七雖遜帥常用重人而四方賓客之至者語言而目不相誰何終日環坐滿堂而太守應決一府之事往往亦不暇盡舉其職故九州之宴賞享勞太守之所游處起居率皆有常處不能以意有所揀擇以為賓客之歡前守今參政歐陽公為揚州始為

平山堂於北岡之上時引客過之由是平山之名
盛聞天下嘉祐八年直史館丹陽刁公自工部郎
中領府事去歐陽公之時纔七十年而平山僅若
有存者皆朽爛剝漫不可支撐公至踰年之後悉
撤而新之又封其庭中以為行春之臺昔之樂聞
平山之名而來者今又將登此以博望遊觀其清
涼高爽有不可以語傳者也揚為天下四方之衝
朝至乎此者夕不知其往民視其上若通道大途
相值偶語一不快其意則遠近搔搔謗喧紛不可
解公於此時能使威令德澤洽於人心政事大小
無一物之失而寄樂於山川草木虛閒曠快之問
人之得此足以為樂而不知其致此之為難也後
之人登是堂思公之所以
樂將有指碑以告者也

國朝金鎮平山堂記

余莅揚值軍興伊始征調旁午數
月始得整理廢陞稍稍就緒偕郡

之賢士大夫觴咏蜀岡之上感平山堂之毀為僧
寺與汪舍人蛟門暨同游諸君將謀復之也既為文
述宋歐陽公治郡政績以其餘力創為是堂及今
之既廢而宜復之意以語共莅茲土者視舊址迤
西又開前後隙地二畝許益之度材量費上自巡
醴侍御既僚屬大夫其心同其言樂以九月經始
歲終迄成事木石堅緻黝堊鮮彩軒檐既啟江山
欲來五百年之壯觀一朝頓復適余奉

視郵

政於江寧喜其將去而落成也復偕諸君子登山
置酒而樂之邵之父老既散既愉士女奔湊攀崖
捫級來觀者不絕是時適攜李曹司農至首為五
十韻長句紀其事凡郡之縉紳學士及四方名流
無不揆宮徵敲金石效竒呈美於茲堂之上論者
謂與蘇王秦劉諸賢之唱和不相上下而惜乎余
非歐陽公其人也夫一堂之興復微耳然人情欣
欣若以為事之必不可少何也方今東南多事揚

以四達之術吾得與二三子保境休息於此里門
宴開守望不事四方之結轂而至者指為樂土此
非大幸耶當此之時而使前賢之名跡缺焉湮沒
至廢為梵鐘燈火之場而不恤既非所以稱為民
父母之意揆之人情亦必有鬱然不樂者也以余
之德薄所以能使一時之爭勸其事而歡樂其成
功者凡以順人情之所欲為而已然為此於萬難
倥偬之際比之前人創建之日其勢尤有不易者
非諸君子之協力交贊即予何能藉

朱彛尊真賞

樓記

平山之堂既成越明年中書舍人汪君季角
拓堂後地為樓五楹設粟主以祀歐陽永叔

劉仲原父蘇子瞻諸君子名曰真賞之樓蓋取諸永
叔寄仲原父詩中語也君既為文勒堂隅識落成
之歲月請予作斯樓記於是樓成又逾年矣方山
陰金公將知揚州府事實期予適館既而予不果

往及開堂成之日四方知名士會者百人多子舊
好成賦詩紀其事顧予獨客二千里外不復與私
心竊悔且憾回憶曩時客揚州登堂之故址草深
數尺欲求頽垣斷砌所在不能辨識愴然長謠謂
茲堂之勝殆不可復覩曾幾何時而晴閣畫檻忽
涌三城之表且有飛樓峙其後既感廢興之相奪
復歎賢者之必有其助也當永叔築堂時特出一
時與會所寄然春風楊柳蓋別久而不忘子瞻三
過其下悵仙翁之不見至題詞快哉亭尚吟思此
堂未已即永叔亦感仲原父能留其游賞之地賦
詩遠寄是當時諸君子未嘗一日忘茲堂可知已
肇祀焉庶其馮依而不去者與堂之廢自世人視
為游觀之所可以有無守是邦者或不為葺治至
於日圯理固然也試登是樓見永叔以下凡官此
土有澤於民者皆得置主以祀後之君子必能師
金公之遺意克修前賢之蹟則是斯樓成而平山

之堂始可歷久不廢足以見汪君之用意深且遠也予雖不獲觀堂落成與諸名士賦詩之末猶幸勒名樓下附汪君之文並傳於後亦可以勿憾矣夫

谷林堂在甘泉縣宋元祐中建蘇轍詩深谷下窈窕高林合扶疎

景范堂在興化縣廳後范仲淹嘗宰是邑後人思之作是堂

三至堂在泰州治內宋曾肇建肇祖致堯咸平中知泰州父易占知如臯肇復典是郡因立三至堂

堂後有六詠亭積翠亭

文會堂在秦州舊治內宋天聖間滕宗諒為郡從事建與范仲淹富弼胡瑗唱和其中

讀書堂在秦州東北八十里景德寺東廊宋天聖中富弼隨父任與胡瑗周孟陽同讀書於此時范仲淹滕宗諒俱官海陵謂三人皆公輔器厚遇之後果然

瞻衮堂在秦州北城上宋紹興間韓世忠移軍楚

州命提舉董旼築城於高沙都督張浚嘗次於此
因築臺曰瞻衣

芍藥廳在江都縣治內輿地紀勝云州宅舊有此
廳在都廳之後聚一州芍藥絕品於其中今鎮淮
堂是也

董仲舒宅在江都縣大東門之外今兩淮運司署
即其地內有董井府志云井上有亭有碑

謝安宅在江都縣運司前法雲寺內晉寧康間安

鎮廣陵居此手植雙檜至唐猶存

楊行密宅即江都縣之光孝院行密於光化間以宅施為僧院

李昇宅在江都縣春亭寺

朱壽昌宅在高郵州城西小街內壽昌事母至孝建有彰孝坊

高麗館在江都縣南門外宋元豐七年詔京東淮南築高麗館以待朝貢之使紹興三十一年向子

固重建榜其門曰南浦亭曰瞻雲

四達齋在高郵州舊治內宋郡守趙晦之建蘇軾
為之銘

螢苑在甘泉縣隋大業末帝幸江都大索螢火數
斛夜出遊山故之光遍岩谷故名唐杜牧之詩有
秋風故螢苑之句

隋苑在甘泉縣大儀鄉一名上林苑唐杜牧詩紅
霞一抹廣陵春指此

皂角林在江都縣瓜洲鎮北原有皂角樹三株相距數里南幾志云今為遞鋪宋楊萬里詩有河邊落葉知何樹今古相傳皂角林之句

萬花園在江都縣堡城內宋端平十三年制使趙葵即統制署為之

壺春園在江都縣大市東宋寶祐志云東酒庫內有佳麗樓稱郡康處即此

影園在江都縣明鄭元勳別業崇禎庚辰夏園中

黃牡丹盛開廣集名流讌賦南海黎遂球作稱第
一元勲貽以二觥一時稱盛

東園在儀徵縣東翼城內宋皇祐間侍御許元建
中有澄虛閣清讌堂共樂堂拂雲亭諸舊蹟附宋

歐陽修真州東園記

真為州當東南之水會故為江淮兩浙荆湖發運使之治

所龍圖閣直學士施君正臣侍御史許君子春之
為使也得監察御史裏行馬君仲塗為其判官三
人者樂其相得之歡而因其暇日得州之監軍廢
營以作東園而日往遊焉歲秋八月子春以其職
事走京師圖其所謂東園者來以示予曰園之廣
百畝而流水橫其前清池浸其右高臺起其北臺

吾望以拂雲之亭池吾俯以澄虛之閣水吾泛以
畫舫之舟故其中以為清讖之堂闢其後以為射
宿之圃芙蓉芰荷之的歷幽蘭白芷之芬芳與夫
佳花美木列植而交陰此前日之蒼烟白露而荆棘
也高甍巨楠水光日景動搖而下上其寬閒深靚
可以答遠響而生清風此前日之頽垣斷塹而荒
墟也嘉時令節州人士女嘯歌而管絃此前日之
晦晏風雨颺颺鳥獸之嗥音也吾於是信有力焉
凡圃之所載蓋其一二之畧也若乃升於高以望
江山之遠近嬉於水而逐魚鳥之浮沉其物象意
趣登臨之樂覽者各自得焉凡工之所不能畫者
吾亦不能言也其為我書其大槩焉又曰真天下
之衝也四方之賓客往來者吾與之共樂於此豈
獨私吾三人者哉然而池臺日益以新草樹日益
以茂四方之士無日而不來而吾三人者有時而
皆去也豈不春春於是哉不為之記則後孰知其

自吾三人者始也。子以為三君子之材，賢足以相濟，而又協於其職，知所後先，使上下給足，而東南六路之人無辛苦愁怨之聲，然後休其餘閑，又與四方之賢士大夫共樂於此，是皆可嘉也。乃為之書。

梅園在儀徵縣西十五里，中有古意亭。宋嘉定間，郡守吳機建。

衆樂園在高郵州郡圃。宋郡守楊蟠所作。堂曰時燕，豐瑞閣曰搖輝，玉水臺曰華胥，亭曰明珠，四香序，賢庵曰塵外，迷春。

唐郡圃在江都縣唐開元間有杏數十株花時如
錦太守張晏立館其下曰爭春後人號圃曰杏村
芍藥圃在江都縣禪智寺前宋韓琦守郡圃中發
金帶園四朶非常種也讌時王珪為監郡王安石
為幕官陳升之初授衙尉丞過此亦與焉各簪其
一後四公相繼登宰輔

白沙鎮今儀徵縣治南唐徐溫自金陵來朝因改
白沙為迎鑿鎮

二十四橋在甘泉縣隋置皆以城門坊市為名後
周顯德四年韓令坤築州城分布阡陌別立橋梁
所謂二十四橋者或存或廢不可得而考矣唐杜
牧之寄韓判官詩二十四橋明月夜玉人何處教
吹簫宋歐陽修詩都將二十四橋月換却西湖十
頃秋

桑里在江都縣西南二十里宋大明三年沈慶之
攻竟陵王誕於廣陵宋主命於桑里置烽火即此

嵇家莊在高郵州東南十五里宋末嵇聳迎文天祥於家事之甚謹復使其子與客伴送至秦州天祥得由通州航海達閩天祥再至嵇家莊詩云小泊嵇莊月正絃莊官驚問又何船今朝哨馬灣頭出又在青山大路邊

三阿在高郵州西八十里即北河鎮在晉為三阿謝安破苻堅將彭超之地唐為下阿徐敬業屯兵於此

公路浦在甘泉縣伏滔北征記云袁術自九江來
奔袁譚於下邳經此因名

胥浦在儀徵縣西十里源自小銅山東南流至城
西入於江舊有伍子胥廟浦因名俗傳子胥解劍
渡江處見吳越春秋

關鴨池在江都縣漢江都易王故姬李陽華嘗畜
關鴨於池上

磨劍池宋寶祐志云隋鑄錢監在磨劍池之西

九曲池在甘泉縣隋煬帝欲幸江都命樂人撰水
調九曲建木蘭亭於池上按節歌之因名九曲池
雷塘在甘泉縣亦曰雷陂漢江都王建遊雷陂即
此唐武德中改葬隋煬帝於雷陂南平岡上元蘇
大年詩云雷塘春雨綠波濃古塚寒烟蔓草空斜
日欲沉山色近行人無處問隋宮

郭藥潭在秦州東北十八里港口市相傳唐時有
郭藥二氏居此相為婚姻藥於積薪下得卵殼大

如斗以貯米錢皆不竭郭假之不還一日藥氏釜
中躍生魚卜之家當陷晨具舟逃去而風雷大作
惟遺一織女與郭氏俱陷其地遂成潭每聞潭下
有織機聲後為立龍魚廟

隋堤在江都縣隋大業初開邗溝入江渠廣四十
步旁築御道樹以楊柳時謂之隋堤唐劉禹錫詩
揚子江樓烟景迷隋家宮樹拂金堤

龍舟堰在江都縣南二十里揚子橋西魏主丕臨

江試龍舟於此因名

蓮花塚在興化縣安仁鄉舊傳有嫂姑刈稻姑墮
水嫂援之俱溺瘞道傍塚忽生蓮數朶里人驚異
啟視之乃從口出遂稱蓮花塚

歐陽戍在儀徵縣東北十里水經注云邗溝水上
承歐陽引江入埭六十里至廣陵城即此梁陳間
陳霸先與侯景戰屯之地

瓜步井在江都縣瓜步山相傳魏主燾所鑿又煉

丹井在古儀徵觀後

玉勾井在江都縣蕃釐觀後名勝志云昔有黃冠持畫軸見守帥畫中字皆雲章鳥篆不可識既去使人尾其後至后土祠井而沒乃使獄囚絕下視之見一洞署曰玉勾洞天

蜀井在甘泉縣蜀岡上禪智寺側其泉脉通蜀江相傳有僧洗鉢蜀江失之從此井浮出僧遊揚識之水味甘冽蘇軾曾取大明泉較之以為不如也

題為第一泉

玉女井在高郵州西南樂徐道人郊道光與一女
居井旁煉丹同日上升

澡絲井在泰州東臺場西谿鎮相傳漢董永偕天
女往傭時汲此井以澡絲水源廣不竭每蠶熟時
井有白草根長丈餘如絲然

徐州府

彭城在府東南堯封彭祖於彭城號大彭氏國於

此水經注云大城內有金城東北又有小城小城
西又有一城大司馬琅琊王所修元和志云州內
城貞觀五年築其外城即古大彭氏國也

舞陽城在府西北五十里漢封樊噲為舞陽侯城
此或曰即濮陽之訛

垞城在府北三十里北面臨泗水元和志云故垞
城在彭城北二十六里或曰古崇侯國州志云今
謂之榮城明嘉靖末黃河北徙城遂為漕黃交會

之衝後河口東移榮城乃為內險

呂梁故城在府東元和志云呂梁故城在彭城縣東五十七里即故呂縣也城臨泗水其東二里有三城一在水南一在水中東上一在水北並高齊所築立鎮以防陳寇又呂城東十里呂梁洪上有二城一曰雲夢一曰梁王土人謂雲夢為韓信梁王即彭越又洪西岸有尉遲城唐尉遲敬德督徐州嘗鑿呂梁洪因築此城

曹公故城在府東南六十五里呂梁東岸或言曹公築此以圖呂布西岸又有城臨水是布之所固也號曰呂布固魏書地形志云呂布自下邳與曹公相持築城於此城上有戰臺亦布所築

彌黎城水經注云彭城西南有彌黎城新志云縣南太山傍有迷劉城蓋彌黎之訛也

曹馬城在蕭縣舊城西北中有古塔相傳曹操曾駐馬於此

郭城在蕭縣西南二十五里相傳後周太祖所築
南畿志云方二千三百步

扶陽城在蕭縣西南五十里漢丞相韋賢封邑於
此又見亳州

蕭子國城在蕭縣治西北城臨古汴城邑攷云古
蕭國城一名黃楊城亦謂北城在舊城北二十里
古縣皆治此宋時河決徙治南城明萬歷五年沒
於水乃遷今治去舊城十里

杼秋城在蕭縣西七十里漢置後漢書云杼秋縣
名屬梁國光武封劉般為侯於此

狐父城在碭山縣西南三十里史記云曹參擊秦
將司馬尼於碭東破之取碭狐父即此亦名狐父
聚

梁城在碭山縣城內漢以秦碭郡為梁國梁孝王
增築之今縣治居其東北隅

碭縣故城在今碭山縣南秦置即今永城界之保安鎮

下邑故城在今碭山縣東三里秦置

安陽故城在碭山縣東北二十五里春秋時麻城也後魏置安陽縣魏收志云安陽縣治麻城是也今為麻城集

香城在碭山縣南水經注云碭陵中有香城

司馬城在豐縣西北三十五里漢浮陽侯司馬耀所封邑有鐵碑

邀帝城在豐縣西南二十里漢高帝征黥布過沛

沛父老送至豐西力請復豐帝從之因名其城曰
邀帝亦曰邀駕城

偃王城在豐縣北五十里相傳徐偃王所築

仲虺城在沛縣南四十里半屬府境相傳仲虺居
此晉地道記云仲虺城在薛城西三十里俗名斗
城

廣戚故城在沛縣東五里泗河之東漢為廣戚侯
國莽居攝元年奉孺子嬰為漢嗣改縣曰力聚明

嘉靖中又於此築城曰沽頭城舊有沽頭牖三今皆圮

泗水舊城在沛縣治東秦以沛為泗水郡治

湖陵城在沛縣西北五十里與山東魚臺縣接界故宋邑秦置縣今為湖陵牖去廟道口十八里運

河所經也又有灌城在縣西北二十里相傳漢將灌嬰所築又泗河東岸有舊城相傳張士誠所築留縣故城在沛縣東南五十里春秋曰襄公元年

楚子辛侵宋呂留杜預注云彭城郡之呂城留城也秦置縣漢封張良為留侯國於此

下邳城在邳州東三里春秋時邳國應劭曰邳在薛後徙於此故曰下邳秦置下邳縣漢封韓信為楚王都此寰宇記云下邳有三城大城中城呂布築小城石崇築

良成故城在邳州北六十里春秋云昭公十三年晉侯將會吳子於良是也漢封魯安王子文德為

良成侯國於此後為縣北齊省隋志云有良城縣
乃故武原縣非良成也

武原故城在邳州西北百里勝陽山西泐口社漢
置縣

祖口城在邳州東北春秋云諸侯會吳於祖是也
水經注云沐水東南經祖口城東合祖水

余行城在邳州北八十里受賢鄉元季平章王信
築俗稱為余行省城

下相城在宿遷縣西界輿地廣記云宿遷秦下相地應劭曰相水出沛國相縣於水下流置縣故曰下也今縣西七里有下相社又有項王故城在運河西三里

凌縣故城在宿遷縣東南五十里秦置凌縣漢為泗水國水經注云泗水東經凌柵南即舊凌縣治也

宿預故城在宿遷縣東南漢置公猶縣晉改置宿

預

司吾故城在宿遷縣北春秋時鍾吾國漢置司吾
縣應劭曰鍾吾國即司吾也魏時訛曰峒晤水經
注云司吾城在司吾山東寰宇記云峒晤鎮在今
縣西北七十里司吾故鄉

樊階城在宿遷縣西北亦作樊諧通鑑云宋秦始
元年沈攸之退保樊階城是也

古城在睢寧縣西北七十里俗名瞻王城南畿志

云在宿遷治西五里相傳項羽所築又有新城在
縣東北五十里南畿志云韓平章守禦邳州所築
九城在睢寧縣東北二十五里有東西二城

取慮城在睢寧縣西南秦置縣漢志云汝南步游
張為取慮令即此

小市門即府城通汴門北史云世祖至彭城登亞
父塚以望城內遣宋隊主蒯應至小市門宣詔勞
問江夏王義恭即此

白門即邳州大城之門元和志云下邳縣即古邳國城城有三重大城周迴十二里半魏武擒呂布於白門即大城之門也中城周四里呂布所守小城累磚堅峻周二里許晉北中郎將荀彧邳臺所治西南又有一城石崇所築也輿地志謂白門在徐州南門詳見辨訛

沛縣舊治在今沛縣北秦置縣為泗水郡治漢為高祖湯沐邑後以屬沛郡謂之小沛水經注云泗

水經沛東合黃水又南經小沛縣東寰宇記謂徵山下有故沛城即小沛也

陽平故郡在府北魏收志云南陽平郡治沛南界後寄治沛城隋志云周併南陽平郡入彭城

晉寧故郡在宿遷縣東南晉置

永固舊縣在蕭縣東南四十里永固山下元至大間置縣於此今為永固鎮

睢陵故縣即今睢寧治漢為侯國後為縣

西楚故宮在府治內宋時猶存俗呼為霸王殿

沛宮在沛縣東南二十里漢高帝宴父老於沛宮

即此史記云孝惠五年以為高祖原廟附唐柳宗

元沛上原廟碑銘

昔在帝克光有四海元首萬邦時則舜禹稷高佐命垂統股肱

天下聖德未衰而內禋元臣繼天而受命四姓承休迭有中邦五神運運炎德復起周道削滅秦德

暴戾皇天疇庸審厥保承乃命唐帝之後振而興之又俾元臣之後翊而登之所以紹復丕績不墜

厥祀故曲逆起為策士輔成帝圖吐謀洞靈奮竒如神舜之胄也汝陰脫帝網推臨暴氣扶乘天休

運行嘉謀禹之苗也鄒侯保綏三秦控引漢中宏器邠度以大帝業禹之裔也淮陰整齊天兵蕩揚

靈威覆趙平魏拔齊殄楚平陽破三秦收魏王絳
侯定楚地固劉氏皆稷之裔也克復克緒昭哉甚
明天意若曰建大德者必唐帝之冑故漢氏興焉
翼炎運者必唐臣之孫故羣雄登焉是以高帝誕
膺聖祚以垂德厚探吳宮之粵首載幽明之休祐
殺白帝於大澤以承其靈建赤旂於沛邑以昭其
神假手於嬴以混諸侯馮力於項以離闕東奉纘
堯之元命而四代之後咸獻其用德承木之大統
而秦楚之威不保其位既建皇極設都咸陽撫正
四方訓齊天下乃樂沛宮以追造邦之奉乃歌大
風以昭武成之德乃奠舊都以壯王業之基生為
湯沐邑沒為思樂之地且曰萬歲之下魂游於此
惟茲原廟沛宮之舊也祭蚩尤於是庭而赤精降
瀛靈命於是邦而羣雄至登布衣於萬乘而子孫
得以纘其緒化環堵為四海而黎元得以安其業
基岱岳之高源洪河之長蓄靈擁休此焉發跡蓋

以道備於是而後行之天下制處於是而後廣之
宇內天下備其道而神復乎本宇內成其制而心
懷其舊宜其正名以表功用成其始俾生靈盡其
敬焉陳本以宅神用成其終俾生靈盡其慕焉故
高帝定位建茲闕宮惠皇嗣服爰立清廟綿越千
祀至今血食此所以成終而成始也且夫以斷蛇
之威安知不運其靈用佐歲功以流澤歟以約法
之仁安知不流其神暎相舊邦之遺黎歟以紹唐
之餘慶統天之遺烈安知不奮其神化大祐於下
土歟然則展敬乞靈焉可已也銘於萬邑以地天命
其辭曰蕩蕩明德時維放勛登翼炎運唐臣之
孫秦綱既離鹿駭東夏長蛇封豕蹈躍中野天復
克緒鍾祐於劉赫矣漢祖播茲皇猷揚旂沛庭約
從諸侯豪慕震豐威聲布流總制虎臣委成良疇
勦殄霸楚遂荒神州區宇懷滿黔黎輯柔表正萬
國炎靈用休定宅咸陽以都上游詔觀本邦在鎬

如周穆穆惠皇宗禋克承崇崇沛官清廟是憑原
念大業隆經茲地方專元命亦舉嚴祀建祈榮鼓
遂據天位魂遊故都永介丕丕祚煥列
唐典嚴恭罔墜勒此休銘以昭本始

利國監在府東北盤馬山下接沛縣界漢元封初
從桑弘羊請於沛縣立鐵官唐置秋邱治宋初升
為監以董其事舊志謂蘇軾所建誤

寶豐監在府治東宋元豐六年置鑄錢局於此八
年廢

燕子樓明一統志云在城西北隅南畿志云在州

解中唐貞元中徐州節度使張愔妾關盼盼所居

黃樓在府城東門上宋熙寧中蘇軾建附宋蘇轍

黃樓賦

熙寧十年七月乙卯河決於澶淵東流鉅野北溢於濟南溢於泗八月戊戌水及彭

城余九子瞻適為彭城守水未至使民具畚鍤蓄土石積葛芟完室隙穴以為水備故水至而民不

恐自戊戌至九月戊辰水及城下者一丈八尺塞東西北門水皆自城際出雨晝夜不止子瞻衣襲

履屨廬於城上調急走發禁卒以從事令民無得竊出避水以身率之與城存亡故水大至而民不

潰方水之淫也汗漫千餘里深廬舍敗塚墓老弱蔽川而下壯者狂走無所得食槁死於丘陵林木

之上子瞻使習水者浮舟楫載餼餌以濟之得脫者無數水既涸消朝廷塞澶淵未暇及徐子瞻曰

澶淵誠塞徐則無害塞不塞天也不可使徐人重
被其患乃請增築徐城相水之衝以堤防之水雖
復至不能以病徐也故水既去而民益親於是即
城之東門為大樓焉堊以黃土曰土能勝水徐人
相勸成之轍方從事於宋登黃樓覽觀山川吊水
之遺迹乃作黃樓之賦其辭曰子瞻與客遊黃樓
之上客仰而望俯而嘆曰噫嘻殆哉在漢元光河
決瓠子騰威鉅野衍溢淮泗梁楚受害二十餘歲
下者為汙澤上者為沮洳民為魚鼈郡縣無所天
子封祀泰山徜徉東方哀民之無辜流死不藏使
公卿負薪以塞宣房瓠子之歌至今傷之嗟維此
邦俯仰千載河東傾而南洩蹈漢世之遺害色原
隰而為一窺吾墉之推敗呂梁甌齒橫絕乎其前
四山連屬合圍乎其外水迴泆而不進環孤城而
為海舞魚龍於隍壑閱帆檣於睥睨方飄風之迅
發震鞀鼓之驚駭誠蟻穴之不救分閭閻之橫潰

幸冬日之既迫水泉縮以自退棲流枿於喬木遺
枯蚌於水喬聽澗淵之奏功非天意吾誰賴今我
與公冠冕裳衣設几布筵斗酒相屬飲酣樂作開
口而笑夫豈偶然也哉子瞻曰今夫安於樂者不
知樂之為樂也必涉於害者而後知之吾嘗與子
憑茲樓而四顧覽天宇之弘大繚青山以為城引
長河而為帶平臯衍其如席桑麻蔚乎芣芣畫阡
陌之縱橫分園廬之向背故田魚於江浦散牛羊
於烟際清風時起微雲靈霽山介開闔蒼莽千里
東望則連山參差與水皆馳羣石傾奔絕流而西
百步涌波舟楫分披魚鼈顛沛沒人所嬉聲崩震
雷城堞為危南望則戲馬之臺巨佛之峯歸乎特
起下窺城中樓觀翺翔巍峩相重激水既平渺莽
浮空駢洲接浦下與淮通西望則山斷為玦傷心
極目麥熟禾秀離離滿隰飛鴻羣往白鳥孤沒橫
烟澹澹俯見落日北望則泗水淩漫古汴入馬淮

為濤淵蛟龍所蟠古木蔽空烏鳥號呼賈客連檣
聯絡城隅送夕陽之西盡道明月之東出金鉦湧
於青嶂陰氛為之辟易窺人窠而直上委餘彩於
沙磧激飛楹而入戶使人體寒而戰慄息洵洵於
羣動聽川流之蕩滴可以起舞相命歡飲千石遺
棄憂患超然自得且子獨不見夫昔之居此者乎
前則項籍劉備後則光弼建封戰馬成羣猛士如
林振臂長嘯風動雲興朱閣青樓舞女歌童勢窮
力竭化為虛空山高水深草生故墟蓋將問其遺
老既已灰滅而無餘矣故吾將與子弔古人之既
逝憫河決於疇昔以變化之無在付杯酒於終日
於是衆客釋然而笑頽然而醉酒傾月墜扶藜而
出

陳師道黃樓銘

熙寧十年京東路安撫使臣某
轉運使臣某判官臣某稽首言

河決澶州南傾淮泗彭城當其衝夾以連山扼以
呂梁流泄不時盈溢千里平地水深丈餘下顧城

中井出脉發東薄兩隅西入通洹南壞水垣土惡
不支百有餘日而後已守臣蘇軾念惟流亡為天
子憂夙夜不怠以勞其人興發戍兵固敵應卒外
為長橋乘高如虹以殺其怒內為大堤附城如環
以持其潰築二坊於南門之外以適南山以安危
疑發倉庾明勸禁以惠困窮以督盜賊宣布恩澤
巡行內外吏民嚮化興於事功法施四邑誠格百
神可謂有功矣宜有褒嘉以揚郡縣十月二日甲
子奏京師明年元豐正月甲子制詔諭意臣軾惟
念祇承謨訓人神力同敢自為功以速大庾而明
揚褒獎無以報稱乃作黃樓於東門具刻明詔以
承天休而明德意使其客陳師道為之銘臣師道
伏惟呂尚南仲內撫百姓外平諸侯詩美文武伊
甫召虎南征北伐功歌宣王君能使人以盡其才
君之明也臣能有功以報其上臣之義也君臣各
盡其道以惠斯民國之福也世之幸也臣師道又

惟感而通之者道也行而化之者德也制法明教
之者政也治人成功者事也昔之詩人歌其政事
則弁其道德而傳之聲名而播之後王有則可舉
而行之顧臣之愚何與於此誠樂其君臣之盡道
云爾臣不佞味死上黃樓銘其詞曰 皇治惟戒
修明法度協和陰陽十有一年天災時行河失其
防齊魯梁楚千里四達潰亂散亡皇仁隱憂臨遣
信臣以惠東方羸老不窮安慰撫養發散積倉流
人如歸居人忘危完聚靡傷天叙地平明聖成能
人神效祥靈平告成百穀豐盈萬邦樂康郡縣祇
畏允迪聖謨終事無荒皇功不居歸休臣民邇昭
遠揚守臣拜手夸大休嘉使民不忘改作黃樓以
臨泗上述修故常庶民無佞原始要終銘
之石章以告成功以揚德聲永永無疆

快哉亭在府城東南即唐薛能陽春亭故址宋熙

寧中李邦直持節徐州建此郡守蘇軾易名曰快哉

放鶴亭在雲龍山西麓宋張天驥築右有古井名飲鶴泉蘇軾有放鶴亭記

蘇墨亭在府東南百步洪洲上明成化中主政尹珍於洪東崖亂石間得石刻一上書郡守蘇軾山人張天驥詩僧道潛月中遊十六字蓋軾守徐時筆也因建亭百洪之洲名曰蘇墨嘉靖間李汝蘭

葺之

黍丘亭在碭山縣南左傳云宋圍曹曹伯陽築五
邑於其郊有黍邱杜預注曰下邑縣西南有黍邱
亭

齧桑亭在沛縣西南戰國策云張儀及齊楚之相
會於齧桑即此徐廣曰齧桑在梁與彭城間

泗水亭在沛縣東南里許漢高祖為亭長即其地

附

漢班固沛水亭碑銘

皇皇聖漢兆自沛豐乾降
著符精感赤龍承魃流裔

襲唐木風寸天尺土無埃斯亭建號宣基維以沛
公揚威斬蛇金精推傷涉闌陵郊像獲秦王應門
造勢斗璧納忠天期乘祚受爵漢中勒陳東征荆
擒三秦靈威神祐鴻溝是乘漢軍收歌楚衆易心
誅項討羽諸夏以康陳張畫策蕭勃翼終出爵褒
賢裂土封功炎火之德彌光以明源清流潔本威
木榮叙將十八贊述股肱休顯運祚永永無疆國
寧家安我君是生根生葉茂舊邑是仍於皇舊亭
苗嗣是承天之
福祐萬年是興

高遷亭在邳州界後漢封尚書令周承為高遷亭
侯十三州志云下邳縣有高遷鄉

昇仙亭在邳州治南相傳州人劉綱於此仙去後

人築亭立嗣

戲馬臺在府城南一里項羽因山築臺以觀戲馬
晉義熙中劉裕在彭城九日大會賓僚賦詩於此
今為臺頭寺有故塔在焉

平臺在碭山舊縣東漢梁孝王大治宮室為複道
自宮連屬於平臺三十里唐為燕喜臺南畿志云
城東五十步臺上有石刻三大字相傳唐李白筆
按李白有秋夜與劉碭山泛燕喜亭池詩

厭氣臺在豐縣城內縣治東始皇東遊築以厭王

氣者

附

宋王禹偁厭氣臺銘

古之王者築靈臺視雲物察氣候之吉凶

知政教之善惡苟理合天道垂休降貞則必日新其德以奉之化失民心為妖作沴則必夕惕其躬以懼之如是則變禍福而反災祥不為難矣烏有築高臺厭王氣行巫覡之事禦天地之災者乎嬴政之有天下也始以利嘴長距難關六國而擅場復以鉤爪鋸牙虎噬萬方而食肉終以多藏厚斂蠶食兆民而富國然後成五嶺築阿房驅周孔之書盡付回祿惑神仙之術但崇方士收大牛之賦則黔首崩分用慘刻之刑則赭衣櫛比鯨鯢國政螻蟻人命原膏野血腥雨膾六國嗷嗷上訴求主天將使民息肩於炎漢故望氣者云東南有天子氣於是祖龍巡狩築臺以厭之殊不知民厭秦

也詐之於天。天厭秦也。授之於漢。秦獨厭天。厭民而自王乎。向使築是臺。告天引咎。遷善樹德。封六國之嗣。復萬民之業。薄賦斂。省徭役。銷戈鏐。兵最稼穡。除高斯之暴政。修唐虞之隆典。下從人望。上答天意。則王氣不厭。而自銷矣。劉項之族。何由而興哉。某遊豐之沛間。觀臺之舊址。思古覽今。悵然有懷。灑翰滿臺。遂為之銘。曰：臺之築兮。救秦之衰。厭之不得為漢之基。氣之厭兮。慮漢之昌。厭之不。得速秦之亡。秦之厭漢。其唯一身。漢之厭秦。乃有萬民。高臺巍哉。王氣氤氳。秦政已矣。漢德為新。決決。臺前占茫茫。後塵故國蕪沒荒。臺草蒸行人。環竦惻愴斯文。

歌風臺在沛縣治東南。舊有亭在泗水西岸。碑刻漢高祖大風歌。亭久傾圯。明成化間移於縣東南。

射戟臺在沛縣南門西後漢袁術攻劉備於沛呂
布馳往救之曰諸君觀布射戟中小枝便當解去
一發果中臺以此名臺上有蜀先主廟

逍遙堂在府治後蘇軾為守時與弟轍會宿於此
各有詩

楚山堂在府城北元錢光弼為平江路總管時建
拱翠堂在蕭縣聖泉山中宋竇敦禮建

彭祖宅在府治西北隅宅舊有井唐皇甫冉詩舊

井莓苔近寢堂是也又城東為彭祖樓方輿勝覽
云汴泗二水經彭城縣彭祖樓之側

漢高祖舊宅在豐縣中陽坊漢高紀云沛豐邑中
陽里人述征記謂在豐水東九十里當作九里

蕭何宅在豐縣東門城下

盧綰宅在豐縣城西北隅綰與高祖同里封燕王
宋建炎中改為永寧寺

大彭館在府西南唐時驛傳所經亦為迎餞之地

以古大彭國為名咸通間龐勛陷彭城執觀察使
崔彥曾於大彭館即此

梁園相傳在碭山縣平臺下梁王育養禽獸之所
李白詩作梁苑枚乘賦作苑園謝惠連賦高適詩
作兔園

樊巷在沛縣歌風臺北即樊噲所居斷碑猶存又
有樊井在南門外相傳屠狗處

紅亭鄉在蕭縣西北左傳云昭八年大蒐於紅杜

預注曰蕭縣西有紅亭水經注謂之鴻溝亭因鴻溝水爲名寰宇記謂之洪亭皆聲相通也

庶里在府西北有龔勝宅漢書云龔勝居彭城之庶里

彭城三里彭城劉氏同出楚元王後宋武帝時劉氏分爲三里以別帝族左將軍劉懷肅居安上里豫州刺史劉懷武居叢亭里宋氏帝族居綏輿里蕭縣有綏輿山即其地

孟徙里在彭城一名瀆上漢韋孟所居

午溝里在碭山縣東北接豐縣界後梁太祖始生之地嘗改為衣錦鄉

伍負里在宿遷縣北七十里桃溝崖

項羽里在宿遷縣舊治北一里梧桐巷

懸水村在府呂梁洪莊子云呂梁懸水三十仞故名
雍門村在府東南五十里戰國時雍門周彈琴見
孟嘗君此其故居

閔子村在蕭縣城南

朱陳村在豐縣東南百里宋蘇軾有題朱陳村嫁娶圖詩

松榆社在豐縣東北十五里漢高祖初起禱松榆社後四年天下悉定詔令豐治松榆社以時祀之顏師古注云以樹為社神也

伏道在豐縣東北城下秦始皇東遊以厭王氣至豐漢高祖即自疑乘夜潛出遁芒碭山至今道中

荆棘皆順生

圯橋在邳州治東南隅年久水沒元和郡志云下邳有沂水號長利池池上有橋即黃石公授書之地東楚謂橋為圯漢書云張良步下邳圯上俗呼圯橋壘文之誤也

焦墟在邳州東宋泰始三年沈攸之援下邳屯軍焦墟即此

寒山堰在府東南十八里梁蕭淵明伐魏嘗於此

壅泗水以灌彭城

蘇堤在府城東南宋蘇軾守郡時河決匯城下築長堤障之

石崇牖在宿遷縣東南三十里故址尚存

楚王井在府西楚王山之南漢楚元王時鑿其井九十有九

柳公井在豐縣西門外公名毅舊立廟有碑

琉璃井在沛縣里許深不可測其味甘冽世傳漢

高帝所鑿

葛洪井在邳州葛嶧山頂世傳葛洪煉丹於此又
舊州治西南有項羽井州北有漆井相傳石崇所鑿
孝感泉在蕭縣舊城中唐王簿宋思禮事繼母孝
大旱母羸疾禱此得泉飲之即愈尉柳冕為刻石
頌其孝感

古墓銘在府治高流之為刺史河決城壞得一墓
銘曰死後三百年背後生流泉賴有高流之遷吾

上高原流之為造棺槨改墓焉

古鼎明萬歷二十八年秋沛縣北朱氏掘地得鼎
中注五銖錢甚多因昇置學宮

石刻竹宋蘇軾筆刻竹二枝於二小石上今嵌沛
縣學宮大門東西壁上

太尉陳球碑在邳州有二附宋洪适跋漢故太尉

篆額陳公名球下邳淮浦人三剖郡符五入御寺
再為三公靈帝光和二年卒本傳載球令繁陽郡
守求賄不獲起督郵令逐之督郵不可曰魏郡十
五城獨繁陽有異政乃止桂陽賊李研陸梁荆部

州郡懦弱不能禁太尉楊秉表為零陵守期而賊散州兵朱蓋反與桂陽胡蘭轉攻零陵編木為城不可守備掾史白遣家避難球怒曰復言者斬乃悉內吏人老弱與共城守私操木為弓相距十餘日會救至賊破詔拜一子為郎熹平元年為廷尉曹節欲別墓竇太后詔公卿大會朝堂球忠憤奮發抗議不撓奸佞為之退聽史載其事六百餘言光和二年為永樂少府與司徒劉郃謀誅宦官事洩下獄死史載其事又三百餘言大凡碑碣率與史傳牴牾球之二碑獨繁陽事迹不同所書零陵平賊事雖破石文缺其存者皆與傳合至廷尉承樂時則一辭不措故熹平之議光和之謀咸無焉殆有所畏而然也嗚呼東漢閭寺之威人主拱手君子喪氣然剛毅之士寧接踵以赴死不詘身以媚竈故漢道雖曰陵遲無法度紀綱可以憑藉而能立國又百餘年者皆忠臣義士之力也漢志雄

陽城有中東門上東門後碑亦作中東城門此碑
云換東城門後殆省文也左傳虞闕父為周陶正
而此作遏父陳敬仲至齊為工正掌百工之官
也而此作公正太尉橋公而此作喬皆借用也又
後碑跋漢故太尉陳公之碑篆額公既不得其死
門人或畏憚凶焰必不敢立石雙表也兩
碑之前幾二百字可讀其末則文字凋落如晨星
相望豈其間蓋有憤懣哀切之語後來亦有所懼
而別之乎漢人隸法有所謂省文者如爵之為吋
鶴之為雀是也經傳多書蟻作蛾似亦是省文左
傳蛾析戴記蛾子時衍列子未聚禽獸蟲蛾黃帝
紀淳化鳥獸蟲蛾元帝紀白蛾羣飛蔽日長楊賦
扶服蛾伏皆讀蛾為蟻隸釋中秋下旬碑
有蛾附之句此云蜂聚蛾動亦蟻省也

試劔石在豐縣漢高祖廟內有石高三尺餘中裂

如破竹不盡者寸許

太倉州

塗松城在州東北三十五里七浦南舊為塗松鎮
宋元豐間去鎮為市張士誠築城設營於此今廢
崇明舊城在崇明縣治東北本通州海濱地唐武
德間海中湧出二洲謂之東西二沙所積高廣魚
樵者依之遂成田廬楊吳因置崇明鎮於西沙宋
天聖三年續漲一沙與東沙接建炎間姚劉二姓

避居之因名姚劉沙建中靖國初又湧一洲於西
北即今之三沙也嘉定中於姚劉沙置天賜鹽場
元至元十二年升姚劉沙為崇明縣改崇明鎮為
西沙以屬之後縣治凡五遷其前三治城郭里居
半歸烟海惟平洋沙城遺址猶彷彿云

塢城在嘉定縣南越絕書云婁門外有鴻城者故
越王城也去吳縣一百五十里姑蘇志謂在嘉定
縣南五十里吳淞江南相傳吳王所築鴻塢字相

類道里亦相近蓋即一城也

嘒城在嘉定縣南門外即唐之嘒城鄉也元設教場於此一名嘒塘又避吳越王諱遂易名曰婁塘滄瀆城在嘉定縣西南四十里晉隆安二年袁山松為吳郡太守時築以備孫恩今半設江中

太倉即今州治相傳孫吳置倉於此舊名東倉元至元十九年建海運倉於此是時海外諸蕃交通市易謂之六國馬頭舊無城張士誠始築城守禦

明洪武中置太倉衛弘治十年始割崑山常熟嘉定三縣地置州即故酒庫司為州治按太倉緣始舊說各異詳見城池

後軍廠在嘉定縣東南三十五里宋韓世忠曾駐軍於此

滄江風月樓在州城北巷口

墨妙亭在州淮雲寺元顧信得趙孟頫書即摹石構亭覆之名曰墨妙趙書又有歸去來辭送李愿

歸盤谷序石刻在儒學內

畏壘亭在嘉定縣安亭鎮歸有光讀書其中名曰
畏壘自為記

婁曲草堂在鎮洋縣武陵橋下殷奎所居又有春
水船最勝為奎讀書處

農隱堂在嘉定縣黃姑塘龔昱與陸游劉過吟咏
唱和處

嘉樹堂在嘉定縣北三十里練祈塘宋強氏所居

強先世贊自汴居吳手植嘉木如皂莢二百餘年
物也

致美堂在嘉定縣歸有光所居也堂前有二石歸
有二石歌

芝秀軒在州元馬廷玉所居虞集書額李光孝撰
記楊維貞撰歌辭時稱三絕

江雨軒在鎮洋縣東北五十里茜涇元偶桓所居
瑞竹軒在嘉定縣集仙宮元大德中道士孫應元

以枯竹架薔薇竹忽叢茂成林因名其軒曰瑞竹
團溪魚樂亦名樂隱園在州沙頭鎮元瞿逢祥隱
居處楊維貞記

李重發隱居在崇明縣姚劉沙

周氏園在州普福寺後周棠創又築七岡在雙鳳
菽園在州城西南隅明德坊明參政陸容所構相
近又有錦溪別墅明參政陸晁築

東園在州東門外王錫爵家園水石亭榭皆一時

名流所布置其孫時敏加葺焉

弇山園在鎮洋縣隆福寺西明王世貞家園廣七十餘畝中壘三峰曰上弇中弇下弇極亭榭卉木之勝又有澹圃世貞弟世懋所築

譚氏園在嘉定縣月浦上亭館卉木俱勝

秬園在嘉定縣晏海門內侯峒曾之東園也

梅村在州太倉衛西王士騏舊業今名貢園

國朝吳偉業拓而新之易今名

歸村在州西十二里王時敏別業附吳偉業歸村

躬耕記

吾友王烟客奉常治西田於歸涇之上歸涇者去城西十有二里或曰先有歸姓者

居焉或曰以其沿吳塘而北可歸也故名之烟客自號歸村老農築農慶堂以居而以告其友人曰吾年六十蓋已老矣將躬耕乎此閒者疑之曰古之為耕者以其有耕者之樂也土膏陸海畝乃一鍾芍陂白渠灌及萬頃故有築堤作塘開田引瀆役使數千家此美田上腴者之樂也若夫陸渾山中褒斜谷口平疇廣野出於孤峰壘嶂之巔屏棄世事隔絕人代架幽壑以立屋焚深林而冀田此高山窮谷者之樂也烟客自奉常謝政幅巾里門有城中賜第以安起居有近郊別墅以娛杖履圖書足以供朝夕之翫賓客足以接談笑之樂又何必去城市謝朋黨以樂此躬耕為也烟客曰不然

此田是先朝祿賜之所遺也是先相國文肅所以
貽子孫也往者神廟之世海內又安生民不見兵
火江以南大臣之致政家居者美田宅盛其舍厚
自奉養而吾祖惟得海濱寢邱之地以供饘粥蕭
閑杜門不知家人生計性愛田野嗜花藥開種竹
之圃於東郊築藝菊之亭於北郭而猶患過客之
跡我也晚歲置書存問郡邑大夫執板而賀謁者
車填馬咽而吾祖命小舟檣短策逍遙於南陌北
阡遇者不知為三公也即今三十餘年而韋相之
莊籬落猶存陸生之田桑麻如故舊老遺民尚有
過而歎息者吾為人子孫忍使芾而不治乎且吾
受前人餘澤奉車省闕陪祀陵園以及親郊視學
大閱藉田無不具簪笏以從已而持節御命渡錢
塘入豫章涉沅湘踰閩嶠足跡幾半天下世故流
離哀遲頽暮猶得守先疇之畝畝以送餘齒退而
與田夫野叟談昇平之遺事叙生平之舊游不亦

幸歟若夫歌舞陸博通飲食侈遊觀下至逐什一之利競錐刀之末者非吾之所樂也吳偉業聞之曰追述祖德禮也保素節而出流俗義也其為躬耕也大且備矣是不可以不記

黃姑村在州張涇關渡東南三三相傳牽牛織女

二星降其地織女以金篋畫河水湧牽牛不得渡

土人因立祠俗呼織女廟廟西有水名百沸河

周公村在嘉定縣西南鄉巡撫周忱常步村舍有

老嫗預知將至治饌餉之今遂名其村

新豐鄉在嘉定縣南三十六里宋咸淳中里民築

土得石刻曰唐新豐鄉今之黃渡即其地

練祁市今嘉定縣治本崑山縣之春申鄉地宋嘉定間割崑山西鄉之安亭并東鄉之春申臨江平樂醋塘凡五鄉就練祁要會之地置縣以年號為名

水格分濤在崇明縣大洋中水分鹽淡水色白鹽水色黑淡水自西來鹽水自東至每潮轉濤分兩水相激聲若雷霆

蝦港在崇明縣東三沙俗傳宋高宗南渡至此有大蝦二湧水挾船出海因名

仙人踪在嘉定縣南馬陸村有池如人跡水旱無

盈縮

楊涇在寶山縣西四十里土人楊九娘性至孝父命夜守桔槔為蚊嚙不易其處竟以羸死里人傷而祀之其地廣九里今絕無蚊

鶴跡石在嘉定縣南翔講寺相傳里人掘地得石

徑丈常有二鶴飛集其上寺以是與人謂為來鶴
之祥

佛耳泉在寶山縣月浦鎮淨信講寺內宋寶慶間
建寺有僧道嵩鑿井得縣木佛耳甚異之因名佛
耳泉今存

菊花泉在寶山縣楊涇涇下有泉湧出飲之令人
壽

婁塘古松在嘉定縣婁塘鎮北野田中大可十圍

橫旦數畝相傳是宋時物

西隱雙松在嘉定縣西隱寺大殿前有羅漢松二株大可合抱今殿燬松榮茂如舊

古梧桐在嘉定縣七都浦陳氏墓大可兩合抱高十丈數百年物也海舶在洋中百里外即見此樹古桂在寶山縣侯氏宅高數丈大數圍可蔭四五畝花時香聞十里外

栲栳雙鍾元至正中二鍾隨潮至崇明東沙岸旁

相擊作聲王人取之一置壽安寺一置慈濟寺晨昏扣之皆作拘拷音

海州

朐縣故城在州東孔望山之西秦置漢書志注云秦始皇立石海上以為東門闕寰宇記云古盧王城在縣西九里即漢舊朐縣梁天監中魏將盧昶屯據此城故以為名

艾不城在州東北田橫避難漢使艾不追橫所築

後晉移贛榆縣於此北齊天保初省

鍾離昧城在州南史記云項王亡將鍾離昧家在
伊盧後漢志云朐縣有伊盧鄉元和志云在朐縣
一百里其城即昧所築寰宇記云伊盧鄉亦名中
盧盧石在東句盧在西故曰中盧

古州城在州城東前接高山後枕積水其山半壘
石為城東南面海地理新書以為即古海州其山
之巔為孔望山明御史黃國用建亭於上曰孔望

亭南畿志云下有龍洞東有浴龍池古今題咏石刻甚多

紀鄆城在贛榆縣東北七十五里左傳云齊伐莒莒子奔紀鄆杜預注曰贛榆縣東北有紀城即紀鄆也南北朝為戍守處水經注云游水自贛榆又東北經紀鄆故城南又東北入海

祝其城在贛榆縣西南四十二里水經注云游水自羽山又北經祝其縣故城西縣東有夾谷浦

莒城在贛榆縣西十五里水經注云游水自祝其
又左經即丘故城莒子始起此後徒莒世謂此為
南莒

贛榆故城有二一在贛榆縣東北三十里者漢縣
也元和志云亦名鹽倉城一在故東海縣北四十
九里青山之陰者唐縣也元和志云隋末土人臧
君相築

利成故城在贛榆縣西六十里漢置水經注云游

水自朐縣又北經利成故城東故利鄉也又曰武陽溝水東出倉山山有鹽官城即古利成也

虎坑城在贛榆縣西南北朝置戍處

抗金城在贛榆縣西南五十里宋時築

界牆城在贛榆縣北六十里東際海西連山

中城在沭陽縣西左傳云成九年城中城杜注曰

厚丘縣西南有中城或曰即建陵縣

厚丘故城在沭陽縣北六十里漢置

建陵故城在沭陽縣建陵山下漢為侯國後魏置
建陵縣

陰平故城在沭陽縣西北六十里漢置

懷文故城即今沭陽縣治本漢厚邱縣地東魏為
沭陽郡兼置下城臨渣懷文服武等縣後周改懷
文為沭陽

舊縣城在沭陽縣南二里宋元嘉四年築土為城
即下城廢縣

浮營城在沭陽縣西二十五里又南營城在縣東南十五里黃軍營城在縣西南五里黑軍營城在縣西十五里東營城在縣南十里西北營二城在縣西北十里新興營城在縣西北三十里皆元至正間築

武陵故郡在贛榆縣南五十九里魏置縣南有洛安鎮即故洛安縣也

義塘故郡在贛榆縣西北近莒州界東魏武定七

年置義塘郡治黃郭城領義塘歸義懷仁三縣寰
宇記云歸義在縣北二十五里懷仁在縣西二十
三里古辟陽城

海西故縣在州南漢置

曲陽故縣在州南漢置今為曲陽村

東安故縣在州治西八十三里漢置

東海故縣在州治東北古鬱洲也水經注云胸縣
東北海中有大洲謂之郁洲後漢書志注云山海

經曰鬱洲在海中一曰郁洲郭璞云在縣界世傳
此山自蒼梧徙來上皆有南方樹木博物記云縣
東北海邊植石秦時立之東門宋秦始六年置西
海郡魏武定七年改曰東海舊有大小二城宋賈
似道築今為東海營

望梅樓在州治北宋王珪詩云城外滄溟日夜流
城南山色近城樓

景疏樓在州治東北石延年通判海州以州西北

二古墓為二疏墓刻碑其旁後遂收入園經建有景疏樓皆仍延年之誤也詳見辨訛

聖化亭在州治西五十里夾谷山

曠書臺在贛榆縣西三十里子貢山俗傳端木子讀書於此

龍且故壘在州治東北有大小二壘韓信下齊項羽遣龍且築壘於此

海口故壘在州之黑土灣海口有古營壘

大營在州治西五里元阿魯尚書攻圍海州時築
昇仙墩在沭陽縣治東南二里紫陽真人昇仙處
秦始皇碑在贛榆縣東地道記云海中去岸百九
十步有始皇碑長一丈八尺廣五尺厚八尺三寸
一行十三字潮水至加其上三丈去則三尺見也
落星石在贛榆縣北四十里隕星化石高一丈白
如玉

東海大松在州東大海中相傳三代時物秀異竒

古宋徐積有詩

通州

秦興舊城在秦興縣西北南唐昇元初析海陵置
縣距今縣治四十里

靜海故縣今州治本漢海陵縣地後周顯德中置
通州以靜海縣屬焉

海門故縣在州東續文獻通攷云海陵縣東境其
地為東沛洲楊吳為東布鎮南唐置縣元明間歷

經江海侵逼三徙治所

國朝康熙十一年縣城圯於海遂廢入通州

臨江故縣在如臯縣南本海陵縣地晉安帝置後

周并入寧海縣

古鄆邑在如臯縣北春秋云哀十二年衛侯會吳於鄆公及衛侯宋皇瑗盟杜預註曰鄆發陽也海陵東南有發繇口今縣北立發口蓋其地又縣東十里有會盟原相傳吳楚會盟處攷春秋之世吳

楚始終不聞會盟惟有衛侯會吳一事會盟原當
指此

海山樓在州治南城上宋大觀中州守朱彥建前
有綠漪亭陳博古詩云門外海濤奔鐵騎檻前山
背擁金鰲

望江樓明正德中州守夏邦謨建後郡人尚書馬
坤重建於州南二里許名曰望江以備倭也
萃景樓在州南狼山明嘉靖中同知舒纓建

勅書樓在泰興縣治廳前宋元豐中建宣和中重修

棲雲閣在州狼山西宋咸寧中建輿地志云閣後即望仙橋宋王覲記謂仙人呂洞賓臥於雲中騰空去州人翹望之閣名因此

三會堂在州狼山東北顧巨海南瞰長江吳楚勝槩一覽可盡宋提刑薛球太守臧師顏通判吳天常三人皆舊好會此因名

胡瑗宅在如臯縣南十里俗名胡家莊

芙蓉園在如臯縣南一里宋史聲奉其父逸叟居

此

萬花園在如臯縣治東三里元鎮南王世子建堂
植萬花於此

水繪園在如臯縣冒氏別業饒水竹之勝

利豐監在州南三里古煎鹽之所宋太平興國中
升為監管西亭豐利永興呂四石港利和金沙餘

慶八場

雉臯如臯縣馬塘河岸也岸在水中名雉臯南畿志云即春秋賈大夫射雉之所

集賢里在如臯縣儒學東宋王惟熙王觀王覲王俊人相繼登第鄉人榮之因名其里

狀元坡在如臯縣西北十里宋狀元王俊又讀書院前地也

放鶴田在州呂四場境相傳呂洞賓四遊於此故

以名場放鶴田即其遊處


海門島在州東南海中

布洲峽在州南三十里輿地記云通州有東南二
布洲相傳舊為海沙所漲而成嘗有布機流出因
名

賣魚灣在通州石港場宋文丞相過此有詩

連珠池在如臯縣西北二十里數池相接如連珠
度軍井在如臯縣西十里許宋岳飛鎮通泰引軍

數千人過此飲之不竭因名



江南通志卷三十三